



CH-7144 Vella, 16/12/2016

Novitads dalla suprastanza communal

Consultaziun lescha da vischnauncas

La regenza grischuna ha deliberau il sboz d'ina nova lescha da vischnauncas per la consultaziun. La suprastanza communal ha priu posiziun leutier. Il punct essenzial ei staus da pretender da sbassar il temps da valeivladad da contracts da fusiun. Ei duei esser pusseivel da far adattaziuns suenter ina perioda d'uffeci, aschilunsch ch'il suveran decida quei cun ina maioritad da duas tiarzas.

Cunvegns da collaboraziun cun la Regiun Surselva

La suprastanza communal ha approbau cunvegns da prestaziun cun la Regiun Surselva per cofinanziar il gimnasi dalla Claustra da Mustér per ils onns 2017 – 2019 e per finanziar il traffic regional naven digl 01-01-2017 entochen ils 31-12-2021.

Cunvegna da prestaziun cugl uffeci digl uaul e prighels dalla natira

La suprastanza communal ha renovau la cunvegna da prestaziun per la tgira e survigilanza dils uauls per 2016 - 2019. Il quantum dil tagl annual ei vegnius fixaus da niev sin 6'500 mct.

Project "Rund um den Mundaun"

Las treis vischnauncas Sursaissa Mundaun, Lumnezia ed Ilanz/Glion sco era las pendicularas Sursaissa Mundaun SA han elaborau ensem culla Grischconsulta SA ina strategia pigl avegnir dil territori d'unviern e da stad entuorn il Mundaun. Sur dil plan da basa ei vegniu informau igl 1. da december 2016 en casa da scola a Glion. La suprastanza communal tegn ils habitonts dalla Lumnezia sil current davart il svilup dil project.

Engaschi da gruppas da lavur enteifer il "Project uaul da muntogna"

La fundaziun "Bergwaldprojekt" ei in'instituziun cugl intent da mantener, tgirar e proteger igl uaul e la cuntrada ella muntogna. Quei vegn oravontut fatg entras intermediaziun da gruppas da lavur. La suprastanza communal ha decidiu d'engaschar talas gruppas da lavur durant plirs onns. Las gruppas exequeschan mintgamai durant il meins da fenadur lavurs a maun, per ex. sin sendas da viandar, tier la tgira digl uaul, etc.

Mulin Morissen

Las lavurs per midar igl object dil Mulin Morissen en in menaschi d'ustria ein s'avanzadas tenor plan. Las lavurs duein vegnir terminadas el decuors digl avrel 2017.

Sanaziun punt da lenn Silgin

Ils 12 da zercladur 2016 haveva la radunonza communal approbau il project per la sanaziun totala dalla punt da lenn a Silgin sur il Glogn cun la renovaziun dil piogn sur la Val da Silgin. Ils 24 da november 2016 ei la collaudaziun dallas lavurs succedida.

Punt da sugas Val da Tersnaus

Ils 9 da zercladur 2016 ha la radunonza communal approbau il project per construir ina punt da sugas per pedunzs sur la Val da Tersnaus sin la reit da viandar a Suraua. La punt ei vegnida installada el decuors dils davos gis.

Sanaziun dalla pegna ella Sentupada Vignogn

La suprastanza communal da decidiu da sanar la pegna ella Sentupada Vignogn e da persunter spustar la sanaziun dil scaldament en casa da scola a Lumbrein. Las lavurs vegnan exequidas naven dalla fin da november 2016 entochen ca. miez december. En quei connex ei era vegniu decidiu da baghegiar entuorn duas stanzas el tschaler da schurmetg, ina stanza sco

stanza da giugs e l'otra per mirar films. Plinavon vegn fatg remedura cun las tualettas el plaun sutterran.

Vendita da terren en zona da mistregn Vardons a Vrin

La suprastanza communal ha decidu da vender il terren dalla parcella nr. 9521 che sesanfla en zona da mistregn Vardons a Vrin (rodund 500 m²) a Martin Alig. Plinavon ha ella concedu il dretg da baghegiar a cunfin enviars la zona d'agricultura silla vart enviars nord e vest dalla parcella nr. 9521.

Tablas da beinvegns Lumnezia

La suprastanza intenziunescha da postar tablas da beinvegns per la Lumnezia a Valgronda e Peiden Bogn. El mument succedan tractativas cun ils uffecis cantunals da polizia e construcziun bassa.

Loipas

En cass da munconza da neiv per preparar la loipa a Degen vegn previu sco alternativa da far ina loipa sils cuolms da Degen el contuorn da Parsiras/Pastiras.

Sanaziun stan da tir e pegliaballas Rofna

Il tir cantunal 2018 ha liug en Surselva. Era l'Uniun da tir Rofna vul metter a disposiziun il plaz da sittar per quei eveniment, denton sto quel vegnir sanaus per satisfacer allas pretensiuns dils organisaturs. La suprastanza communal ha taxau la collaboraziun davart la fiasta cantunala da tir 2018 sco impurtanta per la vischnaunca Lumnezia e decidu da sustener la sanaziun dil stan finanziamein. El medem mument ha ella decidu da sanar il terren contaminau da plum entuorn il pegliaballas. Tenor lescha federala ston tut ils stans da tir esser equipai naven digl 1. da schaner 2021 cun sistems da pegliaballas artificials.

Sustegn SST Surselva

La suprastanza communal ha decidu da sustener il SST Surselva (Schneesportteam Surselva) per la sesiun d'unviern 2016/17 cun ina contribuziun finanziaria da CHF 1'000.